



SKUPŠTINA BRČKO DISTRIKTA BiH

Bilten

ZA 2023. GODINU

USVOJEN REBALANS

IZMJENAMA I DOPUNAMA
ZAKONA O BUDŽETU DO
BRŽE REALIZACIJE
KAPITALNIH
PROJEKATA

ŠKOLE POSTAJU
PRAVNA LICA



INTERVJU: ZORICA GAVRIĆ
I ESED OMERović

NIJE PODRŽANA INICIJATIVA
ZA SMJENU GRADONAČELNIKA



SADRŽAJ

UVOD	5
OMOGUĆENO POVEĆANJE PLATA ZAPOSLENIMA U ORGANIMA JAVNE UPRAVE	6
ŠKOLE POSTAJU PRAVNA LICA	7
IZMJENAMA I DOPUNAMA ZAKONA O BUDŽETU DO BRŽE REALIZACIJE KAPITALNIH PROJEKATA	9
USVOJEN REBALANS	10
USVOJEN IZVJEŠTAJ O IZVRŠENJU BUDŽETA BRČKO DISTRIKTA ZA PERIOD OD 1. JANUARA DO 31. DECEMBRA 2022. GODINE	11
NIJE PODRŽANA INICIJATIVA ZA SMJENU GRADONAČELNIKA	13
INTERVJU: ZORICA GAVRIĆ I ESED OMERVIĆ	14
SKUPŠTINA UVELA REGISTAR DONACIJA	17
PREDSJEDNIK POSJETIO „NOĆNI BAZAR“	18
OBILJEŽEN DAN USTANKA NARODA I NARODNOSTI BIH U DRUGOM SVJETSKOM RATU	20
OTVORENA KANCELARIJA TURISTIČKE ORGANIZACIJE	22
140 GODINA TRGOVAČKE ŠKOLE U BRČKOM	23
ČESTITKA PREDSJEDNIKA I POTPREDSJEDNIKA SKUPŠTINE POVODOM POČETKA ŠKOLSKE GODINE	27



IMPRESUM

Stručna služba Skupštine Brčko distrikta BiH

Uređivački tim Biltena:

Urednica:

Maja Kovačević-Gudelj, stručni savjetnik za odnose s javnošću

Tehnička obrada i grafički dizajn:

Mato Radić, tehničar za rukovanje audio i video tehnikom

Prilagodio za web:

Stefan Marjanović, administrator IT sistema

Lektori:

Andrea Antić-Dugeč

Marica Lakić

Fatima Ribić

Fotografije i tekst

Arhiva Stručne službe Skupštine

UVOD



Poštovani čitaocē,

pred tobom je četvrti broj Biltena Skupštine Brčko distrikta BiH. U ovom broju sumiran je rad Skupštine za period od jula do septembra 2023. godine u kojem je Skupština održala četiri redovne sjednice i jednu vanrednu na kojoj je razmatrana, druga po redu, inicijativa za smjenu aktuelnog gradonačelnika, a koja, ovaj put, nije dobila podršku skupštinske većine. Skupština je početkom septembra usvojila rebalans budžeta, te su donesene izmjene i dopune zakona o platama, obrazovanju, budžetu. Stručna služba je i u ovom tromjesečno periodu uvela novinu u svom radu, odnosno Registar donacija koji je dostupan na web-stranici Skupštine.

Od ovog broja predstaviti ćemo i zaposlene u Stručnoj službi Skupštine. Za početak donosimo intervju s referentom za plenarna zasjedanja Zoricom Gavrić i stručnim savjetnikom za normativne poslove i uređenje Službenog glasnika Brčko distrikta BiH Esedom Omerovićem

Pišite nam na info@skupstinabd.ba ili putem *Facebook* stranice Skupštine.

S poštovanjem,

Urednik Biltena
Maja Kovačević Gudelj

OMOGUĆENO POVEĆANJE PLATA

ZAPOSLENIMA U ORGANIMA JAVNE UPRAVE

Filipović: „Ovim izmjenama obezbijedit će se povećanje plata kako je dogovoreno sporazumom između Vlade i Sindikata Brčko distrikta.“



Filipović je napomenuo da će prvo povećanje plata od pet posto biti operativno odmah nakon usvajanja rebalansa, dok će drugo biti početkom naredne godine, te da su izmjenama zakona definisane i naknade za troškove putovanja do posla.

U prvom čitanju usvojene su Izmjene Zakona o državnoj službi kojim se službenicima i namještenicima omogućuje da budu kandidovani na određene javne funkcije u institucijama i pravnim licima koje je osnovao Distrikt, kao i u institucijama na svim nivoima vlasti u entitetima i na nivou BiH.

Skupština Brčko distrikta BiH je održala 47. redovno zasjedanje na kojem je u drugom čitanju usvojila izmjene i dopune zakona o platama i naknadama zaposlenih u organima javne uprave i institucijama Distrikta, Policiji, pravosuđu i o platama i naknadama korisnika budžetskih sredstava u Skupštini, Izornoj komisiji i Kancelariji za reviziju Brčko distrikta BiH.

Potpredsjednik Skupštine Ivo Filipović rekao je da će se ovim izmjenama obezbijediti povećanje plata kako je dogovoreno sporazumom između Vlade i Sindikata Brčko distrikta.



Predsjedavajući Komisije za budžet Srđan Blažić rekao je da se na ovaj način Zakon o državnoj službi usklađuje sa Zakonom o radu Brčko distrikta BiH.

U prvom čitanju usvojene su i Izmjene Zakona o javno-privatnom partnerstvu. Zamjenik gradonačelnika Brčko distrikta Anto Domić rekao je da je na ovaj način preciziran postupak sprovođenja javno-privatnog partnerstva jer se više ne vrši po Zakonu o javnim nabavkama BiH.



Domić je rekao da Izmjene Zakona o javno-privatnom partnerstvu u Brčko distriktu omogućuju angažovanje konsultanata i da se djelatnosti koje nemaju elemente javno-privatnog partnerstva neće moći realizovati po ovom zakonu. Na 47. redovnom zasjedanju Skupština je usvojila zaključak za besplatne karte za parkiranje vozila za trudnice i porodilje i razmatrana je inicijativa za povećanje iznosa dodatka za tuđu njegu i pomoć nezaposlenim licima oboljelim od malignih oboljenja.



ŠKOLE POSTAJU PRAVNA LICA

Skupština Brčko distrikta je na 50. redovnom zasjedanju, u drugom čitanju, usvojila Izmjene Zakona o predškolskom vaspitanju i obrazovanju, kao i Izmjene Zakona o obrazovanju u osnovnim i srednjim školama u Distriktu.

Predsjednik Skupštine Siniša Milić rekao je da su se ovim izmjenama stvorile zakonske pretpostavke da školske ustanove u Distriktu Brčko mogu biti pravna lica.

„To će sigurno učiniti kvalitetnijim kako pripremu tako i sam nastavni proces“, rekao je predsjednik Milić.



Poslanik Siniša Golić, govoreći ispred grupe poslanika koji su predlagači ovih izmjena zakona, istakao je da su izmjene u skladu s Okvirnim zakonom o obrazovanju na nivou BiH, te da će sada i u Distriktu upravljачku odgovornost za funkcionisanje škola kao javnih ustanova preuzeti školski odbori. Sljedeći korak je, kaže Golić, izrada elaborata opravdanosti osnivanja srednjih škola te da je ideja da se postojeća Poljoprivredna i medicinska škola razdvoji na dvije i osnuju medicinska škola i poljoprivredno-prehrambena škola.

„I predškolska ustanova će se formirati kao posebno pravno lice. Stvoreni su uslovi da se i muzička škola formira kao posebna javna ustanova pri čemu je ideja nadležnog odjeljenja da se pored osnovne muzičke dobije i srednja muzička škola. Nadamo se da će to sve biti spremno kako bi u narednoj školskoj godini školske ustanove

mogle samostalno da funkcionišu kao javne“, rekao je Golić.

U drugom čitanju usvojene su i izmjene Zakona o pravnim licima koja osniva Distrikt.

Usvojena je Odluka o načinu upotrebe lakog ličnog električnog vozila na području Distrikta.

Potpredsjednik Skupštine Ivo

Filipović rekao je da je cilj donošenja ove odluke povećanje bezbjednosti pješaka i onih koji koriste ova vozila kao sredstvo prevoza te da će se o tome još razmatrati i ići i do zakonskih rješenja.

Usvojen je Izvještaj o izvršenju budžeta Distrikta za period od 1. januara do 30. juna 2023. godine.



IZMJENAMA I DOPUNAMA ZAKONA O BUDŽETU DO BRŽE REALIZACIJE KAPITALNIH PROJEKTA



Milić: Izmjenama Zakona o budžetu i Zakona o javno-privatnom partnerstvu bit će omogućena brža realizacija kapitalnih projekata

Skupština Brčko distrikta BiH je na 48. redovnoj sjednici usvojila, u drugom čitanju, Izmjene i dopune Zakona o budžetu i Zakona o izvršenju Budžeta Distrikta za 2023. godinu.

U drugom čitanju usvojene su i Izmjene Zakona o platama i drugim naknadama pravobranioca i zamjenika pravobranioca u Pravobranilaštvu Distrikta, izmjene zakona o javno-privatnom

partnerstvu i o državnoj službi u organima javne uprave.

Predsjednik Skupštine Brčko distrikta BiH Siniša Milić rekao je da će Izmjenama Zakona o budžetu i Zakona o javno-privatnom partnerstvu biti omogućena brža realizacija kapitalnih projekata.

Predsjedavajući Zakonodavne komisije Ljubiša Lukić rekao je da su Izmjene Zakona o budžetu usvojene uz devet amandmana od kojih je većina tehničke prirode, osim posljednjeg koji je omogućio projektima za koja su obezbijeđena sredstva u budžetu, a još nemaju građevinsku dozvolu, da uđu u predimplementacionu fazu u kojoj će ostati do realizacije. U Zakonu o platama pravobranioca i zamjenika pravobranioca, kaže Lukić, bila je jedna izmjena, koja se odnosi na to da se korekcija plata vrši tek onda kada prosječna plata u Distriktu dostigne nivo od 1 600 KM, a ne 1 200 KM kako je to bilo u osnovnom zakonu.

U prvom čitanju usvojene su Izmjene Zakona o predškolskom vaspitanju i obrazovanju i Zakona o obrazovanju u osnovnim i srednjim školama Distrikta, te Izmjene Zakona o pravnim licima koje osniva Distrikt kojim će biti omogućeno da se srednje škole u Distriktu konstituišu kao ustanove, odnosno posebna pravna lica.



Lukić: „Izmjene Zakona o budžetu usvojene uz devet amandmana.“

Data je saglasnost na Izmjenu Finansijskog plana Zavoda za zapošljavanje Distrikta za 2023. godinu. Direktorica Zavoda Tamara Duvnjak-Mitrović rekla je da će se ovom izmjenom Programu za samozapošljavanje u poljoprivredi na već izdvojenih 500 000 KM za ove namjene dodati još 81 200 KM neutrošenih sredstava iz prošlogodišnjeg Programa za ove namjene.

Ona je navela da će aplikant moći da dobije maksimalno 22 000 KM.

USVOJEN REBALANS



Na 49. redovnoj sjednici Skupština Brčko distrikta BiH usvojila je Prijedlog rebalansa budžeta Distrikta u iznosu od 40 576 539, 85 KM čime je ukupan budžet Distrikta za 2023. godinu povećan na 322 930 300,64 KM.

Predsjednik Skupštine Siniša Milić rekao je da su rebalansom obezbijedena sredstva za realizaciju niza infrastrukturnih projekata, te povećanje plata zaposlenima u javnom sektoru. On je napomenuo da je to dio obaveza preuzetih dogovorom sa Sindikatom Distrikta u vezi s povećanjem plata zaposlenih u javnoj upravi.

„Obezbijedena su sredstva za jednokratnu novčanu pomoć zaposlenima u javnoj upravi čija plata je manja od 1 200 KM“, rekao je predsjednik Milić.

Predsjedavajući skupštinske Komisije za budžet Srđan Blažić rekao je da je rebalans usvojen uz četiri amandmana Komisije u kojima su sadržani zahtjevi građana

te da su sredstva u rebalansu obezbijedena preraspodjelom postojećeg novca u budžetu Distrikta za 2023. godinu.

On je dodao da su rebalansom obezbijedena dva i po miliona KM za naknadu štete stočarima nastale usljed afričke kuge svinja, 100 000 KM za potrebe udruženja penzionera, kao i sredstva za subvenciju troškova električne energije,

subvenciju Razvojno-garantnom fondu i za podsticaje u poljoprivredi.

Na 49. redovnom zasjedanju poslanici su usvojili dvanaest odluka o utvrđivanju javnog interesa radi realizacije kapitalnih projekata.

Na ovom redovnom zasjedanju zakletvu je položila novoimenovana revizorka za finansijsku reviziju Distrikta Vedrana Ostojić.



USVOJEN IZVJEŠTAJ O IZVRŠENJU BUDŽETA BRČKO DISTRIKTA ZA PERIOD OD 1. JANUARA DO 31. DECEMBRA 2022. GODINE

Skupština je na 48. redovnom zasjedanju usvojila Izvještaj o izvršenju Budžeta Brčko distrikta BiH za fiskalnu 2022. godinu.

Direktorica Trezora Brčko distrikta BiH Nevresa Hasandžiković podsjetila je da je Budžet Brčko distrikta BiH za 2022. godinu u iznosu od 239.163.267 KM usvojen u zakonskom roku, na vanrednoj sjednici Skupštine 15. decembra 2021. godine, da su nakon toga uslijedila dva rebalansa zbog čega je ukupan budžet Distrikta povećan te je s uravnoteženim prihodima i primicima iznosio 304.346.102 KM.

Hasandžikovićeva je rekla da su planirani prihodi u 2022. godinu iznosili 248.885.029 KM, da su realizovani u iznosu od 269.641.492 KM, što je za 8,34 posto više u odnosu na godišnji plan, a 14,02 posto više u odnosu na 2021. godinu.

U strukturi prihoda, kaže Hasandžikovićeva, najznačajnije mjesto pripada indirektnim porezima koji u ukupnom prihodu učestvuju sa 83,92 posto, zatim direktni porezi s učešćem od 11,42 posto, te neporezni prihodi sa 4,58 posto i tekuće donacije i transferi sa 0,08 posto.

„Što se tiče prihoda od poreza isti su planirani u iznosu od 235.000.000 KM, a naplaćeni su u iznosu od 257.061.517 KM. To je za 9,39 posto više u odnosu na godišnji plan, odnosno 14,66 posto više u odnosu na 2021. godinu“, navela je Hasandžikovićeva.

Ona je dodala da su indirektni porezi u okviru grupe poreznih prihoda planirani u iznosu od 206.000.000 KM i da su naplaćeni u iznosu od 226.273.475 KM, što je za 9,84 posto više u odnosu na godišnji plan, odnosno za 14,94 posto više u odnosu na 2021. godinu.



Hasandžikovićeva je rekla da su direktni porezi planirani u iznosu od 29.000.000 KM, a da su realizovani u iznosu od 30.788.041 KM, što je za 6,17 posto više u odnosu na plan prihoda, a 12,65 posto više u odnosu na 2021. godinu.

Prema navedenom izvještaju neporezni prihodi planirani su u iznosu od 13.651.824 KM, ostvareni su u iznosu od 12.035.895 KM, odnosno 90,51 posto više u odnosu na plan.

Rashodi su, kaže Hasandžikovićeva, bili uravnoteženi prihodima i iznosili su 304.346.102 KM, dok su izvršeni u iznosu od 234.573.630 KM ili za 77,07 posto.

„Ovaj procent uključuje ostvarenje i tekućeg i kapitalnog budžeta. Kad se radi o tekućem budžetu on je planiran u iznosu od 245.609.775 KM, a realizovan je u iznosu od

228.830.655 KM ili 92,79 posto. Kad se radi o kapitalnom budžetu njegovo izvršenje je sporije. Planiran je u iznosu od 57.736.327 KM, a realizovan u iznosu od 5.742.975 KM ili 9,82 posto od planiranog budžeta“, istakla je Hasandžikovićeva.

Ona je podsjetila da se u 2022. godini realizovao i kapitalni budžet iz 2021. i 2020. godine.

„Ukoliko posmatramo trogodišnji period realizacije planiranja kapitalnog budžeta za period 20, 21. i 22. godina onda plan kapitalnog budžeta za ovaj period je iznosio 122.564.627 KM. Realizovano je 37.000.000 KM te su raspoloživa sredstva na dan 31. 12. 2022. godine iznosila 85.534.298,31 KM. Što se tiče procenta realizacije trogodišnjeg kapitalnog budžeta on je 30,21 posto. Trebaju se pre-

duzeti mjere u cilju bolje realizacije kapitalnog budžeta“, zaključila je Hasandžikovićeva.

U 2022. godini sredstva rezervi planirana su u iznosu od 1.338.591,81 KM od čega je utrošeno 540.271,10 KM.

Navedeni rashod odnosi se na nabavku medicinskog materijala, vakcina iz COVAX programa u iznosu od 36.199,94 KM, testova za koronu u iznosu od 214.071 KM, zatim pomoć hercegovačkom regionu od 100.000 KM za sanaciju šteta nastalih zemljotresom.

Dio tog novca u iznosu od po 50.000 KM doniran je i opštinama Ljubinje i Čelić u svrhu pomoći u sanaciji šteta uzrokovanih zemljotresom i poplavama, dok je brčanskom Crvenom krstu donirano 90.000 KM.



NIJE PODRŽANA INICIJATIVA ZA SMJENU GRADONAČELNIKA

Skupština Brčko distrikta BiH na 15. vanrednoj sjednici nije podržala inicijativu sedam bošnjačkih poslanika da se Zijad Nišić razriješi dužnosti gradonačelnika.

Protiv ove inicijative bilo je pet poslanika, 16 ih je bilo suzdržano, dok je za smjenu aktuelnog gradonačelnika glasalo osam poslanika.



Intervju

ZORICA GAVRIĆ I ESED OMEROVIĆ

„Za produktivan rad najvažnija je dobra radna atmosfera!“

Razgovarala: Maja Kovačević-Gudelj



Zorica Gavrić, stručni referent za plenarna zasjedanja Skupštine

Zorica Gavrić je stručni referent za plenarna zasjedanja, i na ovim poslovima radi od 1998. godine. Prvih radnih dana u Stručnoj službi rado se sjeća. Kaže imala je 33 godine kada se zaposlila, a posao je učila od starije kolegice Mice Mihajlović, koja je joj i bila mentor.

„Ona mi je bila ne samo mentor i kolegica, već i prijatelj, a često sam u njoj vidjela i majku. Mica je imala bogato radno iskustvo i ona je bila profesionalac u svom poslu.

U posao me je uvela do najsitnijih detalja. Bila je dobar i radnik i čovjek. I danas se družimo, obilazimo jedna drugu i prisjećamo tih radnih dana koje smo provele zajedno, često smijući se našim anegdotama. Tako su mi poslanci znali dostaviti neko pitanje za sjednicu koje sami nisu ni napisali, pa kada im skrenem pažnju na nejasnoće onda odustanu od tog pitanja“, priča Zorica s osmjehom na licu.

Priznaje da je imala veliku tremu

kada je prvi put trebala da sjedi na sjednici Skupštine i vodi zapisnik. Veliku podršku dobila je od kolegice Mice, no, kaže podrška nije izostala ni od ostalih kolega, ali i tadašnjeg rukovodstva Skupštine. Malo po malo i posao je savladan bez problema. Suočavanje sa strahom zapravo je jedini način da se strah savlada i pobijedi, kaže Zorica. „Zahvaljujući odličnoj obuci mog mentora Mice, taj prvi zapisnik je dobro urađen, kao i svaki naredni. U to vrijeme je bilo mnogo teže,



Mica Mihajlović

jer su sjednice počinjale kasno u 14 sati i trajale bi do 22 sata, nekad i do 23 sata, a nastavljale bi se odmah sljedećeg dana. Sve to zahtijevalo je cjelodnevnu koncentraciju i posvećenost poslu. Zapisnici su bili duži, bilo je više prijedloga, zaključaka. Danas je mnogo lakše, jer imamo i to elektronsko poslovanje, s tim što se zapisnici i dalje pišu ručno”, prisjeća se Zorica.

Osim vođenja zapisnika, Zorica radi na izradi poziva za sjednice, kompletiranju i dostavljanju poslanicima radnog materijala za sjednice Skupštine i sjednice poslaničkih klubova u Skupštini, vodi evidenciju poslaničkih pitanja i prosljeđuje ih u nadležnost vladinih odjeljenja i institucija Brčko distrikta, kao i na poslovima arhiviranja knjige zapisnika, i tonskih snimaka sjednice te vodi registar propisa Skupštine i indekse akata, te akte koje je donijela Skupština dostavlja Vladi i institucijama Distrikta.

„Poslije završene sjednice Skupštine kada se lektorišu i dostave svi akti onda se pristupa arhiviranju sjednica Skupštine u za to namijenjenom prostoru. Dokumentaciju nastalu u periodu od 2000. do 2012. godine preuzeo je Arhiv Brčko distrikta. Sva dokumentacija obilježena je po sjednicama Skupštine. Prva, prelazna Skupština održala je 100 sjednica. Arhiviranje dokumenata i dalje se radi samo ručno”, napominje Zorica.

Godine rada u Stručnoj službi broji po mandatima Skupštine, a ovo joj je peti. Do odlaska u penziju Zorici je ostalo da radi još u dva i po mandata.

Na saradnju s poslanicima, ali i kolegama, se ne žali. Kaže da je ta saradnja bila korektna svih ovih godina, te se nada da će tako i ostati do kraja njenog radnog vijeka. Zorica proteklih petnaest godina kancelariju dijeli s kolegom **Esedom Omerovićem**.

„On je došao nakon što je moja kolegica Mica penzionisana. Naši poslovi su još usko vezani te je saradnja neophodna. A bez dobrih kolegijalnih odnosa ni posao neće biti lak. Kod nas to nije slučaj. Poslovi se obavljaju bez pritiska i sa razumijevanjem, i na vrijeme, uz po koju šalu, i odmah sve je lakše”, ističe Zorica dok se njen kolega Esed smije sjećajući se svoje anegdote s početka radne karijere na poslovima stručnog savjetnika za normativne poslove i uređivanje Službenog glasnika Brčko distrikta BiH.

Kaže, jednom je greškom među gomilu akata koje je odnio predsjedniku na potpis stavio i onaj koji nije usvojen. Ostao je zbunjen



Zorica Gavrić

kada mu je akt vraćen nepotpisan, te je ponovo otišao kod predsjednika, i ovaj put bili su zbunjeni obojica. Srećom kaže, predsjednik je brzo reagovao i skrenuo mi pažnju da akt nije usvojen te smo ga prosljedili na usvajanje i tek onda na potpisivanje. Danima smo se tome smijali, priča nam kroz smijeh Esed.

Posao mu je, priznaje, zanimljiv jer ostvaruje saradnju sa različitim institucijama kako u Distriktu tako i širom BiH.

„S druge strane ovaj posao je i zahtjevan iz razloga što se radi o velikoj količini akata koji dolaze i koji zahtijevaju uređivanje, pripremu, utvrđivanje sadržaja svakog izdanja i konačno upućivanje izvršiocu usluga radi štampanja tako utvrđenog sadržaja Službenog glasnika”, ističe Esed.

Esedov posao sastoji se iz dva dijela. Prvi je normativni dio i vezan je za pripremu i rad sjednice



Esed Omerović, Stručni savjetnik za normativne poslove i uređivanje službenog glasnika

Skupštine što podrazumijeva pripremu akata koji se usvajaju na sjednicama.

„Nakon konačnog usvajanja imamo tehničku obradu tih akata, odnosno lektorisanje i nakon toga se objavljuju u Službenom glasniku što čini drugi dio mog posla. Pored akata koje je donijela Skupština, u Službenom glasniku objavljuju se i akti drugih institucija u Distriktu i BiH. Akti Skupštine, kao i Službeni glasnik se objavljuju i na web-stranici Skupštine“, pojasnio je Esed.

On je dodao da Službenom glasniku mogu pristupiti samo pretplatnici te da pretplatnik može biti svako fizičko i pravno lice, dok se pretplata plaća na godišnjem nivou.

„Prije dvanaest godina uveli smo elektronsko izdanje Službenog glasnika. Postoji tendencija povećanja broja pretplatnika za

elektronsko izdanje čime se smanjuje tiraž štampanih primjeraka. Onaj ko hoće da se pretplati pošalje narudžbenicu Sektoru za finansije. Može se pretplatiti kako za štampanu verziju Službenog glasnika, tako i za elektronsku ili za

obje i u tom slučaju ima popust“, ističe Esed.

Esed i Zorica poručuju da je za produktivan rad najvažnija dobra radna atmosfera te da su dobri međuljudski odnosi ključ uspjeha u svakom poslu.



SKUPŠTINA UVELA REGISTAR DONACIJA



Nakon što je uveden softverski modul elektronskog glasanja i prvi informacijski sistem Elektronskog parlamenta u BiH, Stručna služba Skupštine Brčko distrikta je sada samostalno implementirala web-aplikaciju registra donacija udruženjima građana, sportskim kolektivima i vjerskim zajednicama s područja Distrikta. Registar je dostupan na internet stranici Skupštine. Predsjednik Skupštine Brčko distrikta BiH Siniša Milić je rekao da su prednosti ovog registra višestruke te da aplikacija omogućava transparentnost u pogledu trošenja javnih sredstava.

„Građani imaju pristup informacijama o tome kako se sredstva koriste i mogu provjeriti je li novac ispravno utrošen. Registar potiče odgovornost organizacija koje primaju sredstva. Kada su finan-

sijske transakcije javno dostupne, udruženja su sklonija odgovornom korištenju novca i pridržavanju finansijskih pravila. I na kraju, Registar omogućava građanima da na osnovu tih informacija donesu odluke o podržavanju određenih organizacija ili doniranju novca“, rekao je predsjednik Milić.

On je naveo da je Registar programirao administrator za informacione tehnologije u Stručnoj službi Skupštine, po struci diplomirani inženjer elektrotehnike Stefan Marjanović.

Marjanović je rekao da je Registar web-aplikacija koja prati novčani tok donacija Skupštine udruženjima građana, sportskim kolektivima i

vjerskim zajednicama, kao i pravljenje utroška tih sredstava od strane korisnika za tri godine.

„Do sada je u Registar uneseno 312 izvještaja o utrošku doniranih budžetskih sredstava za 2022. i 2021. godinu, koje je podnijelo 95 udruženja građana, sportskih kolektiva i vjerskih zajednica. Podaci se unose i dalje, kontinuirano, kako nam pristignu izvještaji. Unijet ćemo i podatke za 2019. godinu“, naveo je Marjanović.

Marjanović je dodao da Stručna služba Skupštine radi na novim web-aplikacijama koje će olakšati i modernizovati sve poslovne procese koji se odvijaju unutar Skupštine.



Administrator IT sistema - Stefan Marjanović

PREDSJEDNIK POSJETIO „NOĆNI BAZAR“

Predsjednik Skupštine Brčko distrikta BiH Siniša Milić posjetio je sinoć na Trgu mladih „Noćni bazar“, privredno-turističku manifestaciju na kojoj je 25 malih preduzetnika iz našeg grada i okolnih opština predstavilo svoje proizvode.

Predsjednik Milić je obišao izlagače i sa njima razgovarao o mogućnostima koje pruža Distrikt za razvoj malog preduzetništva.

„Ono što je važno jeste da mi stvaramo takav ambijent da ljudi mogu da žive od svog rada. Našim sugrađanima pružamo priliku da dopune kućni budžet i kroz organizaciju ovakvih i sličnih manifestacija“, rekao je predsjednik Milić.

Predsjednik je podsjetio da Distrikt već nekoliko godina pomaže razvoj malog preduzetništva kroz programe samozapošljavanja u privredi i poljoprivredi kako bi se dala šansa nezaposlenim licima s dobrom poslovnom idejom da se okušaju u tim granama.

Savo Lukić, koordinator Voćnog kluba Brčko u čijoj organizaciji je održan „Noćni bazar“, rekao je da je cilj manifestacije da se mali preduzetnici svojom ponudom predstavljaju kupcima, ali i da podstakne ljude, koji se iz hobija bave nekom vrstom kućne radinosti, da pokrenu vlastiti biznis.





OBILJEŽEN DAN USTANKA NARODA I NARODNOSTI BiH U DRUGOM SVJETSKOM RATU

Milić: „Potrebno njegovati slobodarsku tradiciju naših naroda iz Drugog svjetskog rata.“



Povodom obilježavanja 82. godine od ustanka naroda i narodnosti BiH u Drugom svjetskom ratu predsjednik Skupštine Brčko distrikta Siniša Milić položio je vijenac na partizanskom spomen-groblju gdje je potom prisustvovao programu obilježavanja Dana ustanka - 27. jula

Obraćajući se prisutnima predsjednik Milić je rekao da je siguran da je princip zajedništva, kao što je bio tada, neophodan i danas te da je potrebno njegovati slobodarsku tradiciju naših naroda iz Drugog svjetskog rata.

„Treba da negujemo princip da danas sami odlučujemo o svojoj sudbini. Mislim da je to vrhovni princip i u odnosima među državama, a i po pitanju organizacije i funkcionisanja vlasti na prostoru svake države pojedinačno“, poručio je Milić.

Predsjednik SUBNOR-a Brčko Janko Vuković rekao je novinarima da je na Partizanskom spomen-groblju, na kojem se nalazi 17 bisti

narodnih heroja, sahranjeno 437 boraca NOB-a.

On je podsjetio da je 27. jula 1941. godine ustanak podignut u BiH i Hrvatskoj, te da je Srbija prva podigla ustanak 7. jula, a šest dana poslije i Crna Gora.

„U Makedoniji i Sloveniji ustanci su pokrenuti nešto kasnije. Odluka o podizanju ustanaka u svim mjestima na prostoru bivše Jugoslavije donesena je nakon sastanka Centralnog komiteta Komunističke partije Jugoslavije 4. jula. Tih dana vodile su se teške borbe. Njemački okupator je bio daleko moćniji i brojniji, ali naši borci pokazali su da su bili narodni heroji od samog početka. Ravnopravno su se borili protiv neprijatelja i iz tih borbi su izlazili kao pobjednici“, rekao je Vuković.

Potpredsjednik SUBNOR-a Srbije i predsjednik SUBNOR-a AP Vojvodina Jovo Barošćević rekao je da su tog 27. jula narodi s ovih prostora rekli „ne“ fašizmu zbog čega taj datum jeste najznačajniji u istoriji.

Svi narodi, kaže Barošćević, tada su uzeli puške u ruke i krenuli u borbu protiv neprijatelja do samog oslobođenja.

„Zajedno s borcima iz Brčkog, posebno jedinice Vojvođanske brigade su dolazile i vodile borbe po svim ovim mjestima do konačne pobjede. Sve te jedinice dale su maksimum i oko pet, šest stotina njih je ovdje ostavilo živote za slobodu. Zato ćemo uvijek dolaziti ovdje i cijeniti one koji su donijeli slobodu“, istakao je Barošćević.

Mlađim generacijama je poručio da i oni isto cijene slobodu i svoje pretke i da tu slobodu čuvaju te da se zalažu da ona trajno ostane.

Na obilježavanju Dana ustanka naroda i narodnosti u antifašističkoj borbi u Drugom svjetskom ratu u Brčkom prisustvovali su predstavnici vlasti Distrikta, nekoliko političkih partija i građani, te trideset pet delegacija SUBNOR-a iz Brčkog, Republike Srpske, Federacije, Srbije i Hrvatske.



OTVORENA KANCELARIJA TURISTIČKE ORGANIZACIJE



Danas, na Svjetski dan turizma, u Brčkom je na Trgu mladih svečano otvorena kancelarija Turističke organizacije Brčko distrikta BiH.

Predsjednik Skupštine Brčko distrikta Siniša Milić, koji je prisustvovao otvaranju, rekao je da će se ići na izmjenu Zakona o turizmu da bi se boravišna taksa preusmjerila na finansiranje Turističke organizacije kako bi se unaprijedile njene aktivnosti.

Milić je istakao da se na ovom planu može još mnogo toga uraditi te da u tom pogledu Ekonomski fakultet Brčko radi na uvođenju novog smjera iz oblasti menadžmenta u turizmu.

„Sigurno je da je turizam neiskorištena privredna grana kada je u pitanju Distrikt Brčko.

Imamo određene turističke potencijale. Ovo je sada stvaranje organizacionih pretpostavki da se ti potencijali iskoriste“, rekao je Milić u izjavi novinarima.

Vršilac dužnosti direktora Turističke organizacije Brčko distrikta Miloš Stankić rekao je da je u toku izrada web-stranice Turističke organizacije koja će javnosti biti dostupna za mjesec dana.

„*Tu ćemo da objedinimo sve sadržaje, sve manifestacije, restorane, hotele koji se nalaze u našem gradu*“, rekao je Stankić.

Najavio je i izradu strategije razvoja turizma Brčko distrikta te seminar u decembru za lokalno stanovništvo s ciljem unapređenja njegovog znanja o razvoju turizma i kreiranja konceptualnog turističkog sadržaja na području Distrikta.

Član Upravnog odbora Turističke organizacije Brčko distrikta Aleksandar Đurić napomenuo je da će kancelarija biti dostupna svim građanima Distrikta i turistima te da će se u njoj moći dobiti informacije o turističkoj ponudi Distrikta, vodičima i ostalim aktivnostima ove organizacije.

Đurić je napomenuo da je nakon epidemije korona virusa zabilježen rast broja posjeta Distriktu za 10 do 12 posto te da u prosjeku godišnje bude između petnaest i dvadeset pet hiljada posjeta i da dominiraju turisti iz Srbije, Hrvatske i Slovenije. Turistička organizacija Brčko distrikta BiH formirana je početkom januara ove godine s ciljem da radi na razvoju i unapređenju turističke ponude u ovoj lokalnoj zajednici, ali i da nastavi aktivnosti koje je do tada obavljala Služba za turizma Vlade Brčko distrikta BiH.



140 GODINA TRGOVAČKE ŠKOLE U BRČKOM

Predsjednik Skupštine Brčko distrikta BiH Siniša Milić rekao je povodom obilježavanja 140 godina od formiranja Trgovačke škole u Brčkom da je to period razvoja ekonomske misli na ovom prostoru.

Milić je poručio da je znanje samo jedan segment vaspitanja te da svi zajedno moraju učiniti mnogo više da djeca koja izlaze iz obrazovnog sistema, prije svega, budu dobri ljudi jer, ističe, nije nebitno u kojem pravcu će djeca svoja znanja upotrebljavati.

Milić koji je prisustvovao centralnoj svečanosti povodom jubileja u organizaciji Ekonomske škole rekao je da je ovo izazovni period jer se „Kroz izmjene zakona krenulo u ozbiljnu

reformu koja podrazumijeva da škole u Distriktu Brčko postanu pravna lica. To znači da bi se cijeli sistem upravljanja trebao vratiti školama. Mislim da je to iskorak koji će sigurno omogućiti bolje funkcionisanje školskog sistema kod nas pa tako i Ekonomske škole. Čestitam ovaj jubilej svima zaposlenima u Ekonomskoj školi, đacima i svima nama“, rekao je Milić novinarima uoči početka svečanog obilježavanja 140 godina Trgovačke škole u Brčkom.

Gradonačelnik Brčkog Zijad Nišić rekao je da je Ekonomska škola brend grada, da su znanja, vještine i iskustva koja su proizvedena u toj školi oblikovala grad i učinili ga privrednim, ekonomskim i trgovačkim, ali i kulturnim centrom u regionu.

„Znanje je kapital s najvećom kapitalnom stopom i ova škola je bila temelj razvoja ove lokalne zajednice“, rekao je Nišić.

Direktorica Ekonomske škole u Brčkom Zora Pajkanović podsjetila je da je Trgovačka škola bila prva stručna škola u Brčkom, a druga u BiH, da je prva generacija imala desetak đaka te da su se kasnije, iz nje, osnovale Ekonomska škola i Ugostiteljska škola.

Pajkanovićeva je napomenula da je Trgovačka škola bila smještena u zgradi u kojoj se danas nalazi Četvrta osnovna škola i da je zemljište za izgradnju zgrade Trgovačke škole poklonila Srpska pravoslavna crkva. „Istorija škole bila je vrlo bur-

na. Premještala se iz zgrade u zgradu. Zgrada u kojoj je danas smještena Ekonomska škola izgrađena je sredinom prošlog vijeka. Računamo da je kao Ekonomska škola počela da radi 1923. godine i zato govorimo o 100 godina ekonomskog obrazovanja u Brčkom i uvijek naglašavamo da je iz Ekonomske škole prvo proizašla Viša ekonomska škola, a kasnije i Ekonomski fakultet“, rekla je Pajkanovićeva.

Ona je istakla da Ekonomsku školu ove školske godine pohađa manje đaka nego ranijih godina, i da ih ima 650.

„Ranijih godina bilo je oko 700 đaka. U prvom razredu imamo osam smjerova, u starijim razredima imamo još smjerova, tako da ukupno imamo oko dvanaest smjerova svake godine. Nastojimo da uvodimo nove smjerove. Ove godine uveli smo smjer finansijski tehničar. Kada

vidimo da postoji interes đaka za određeni smjer mi to i vratimo ukoliko je smjer ukinut. Prilagođavamo se tržištu“, rekla je Pajkanovićeva.

Ekonomska škola ove godine, osim 140 godina Trgovačke škole obilježava i 100 godina Ekonomske škole i 55 godina Ugostiteljske škole.

Jubileje je obilježila trodnevnim aktivnostima koje su završene svečanim programom.







ČESTITKA PREDsjedNIKA I POTPREDsjedNIKA SKUPŠTINE POVODOM POČETKA ŠKOLSKE GODINE

„Svim đacima i zaposlenima u obrazovanju želimo sretan i uspješan početak nove školske godine.

Dragi đaci, neka vam sticanje znanja ne bude mučno već zabavno i izazovno, a vi budite istrajni i uporni u savladavanju gradiva koje je pred vama, jer samo tako rezultati neće izostati i uspjeh će biti zagarantovan.

Vašim učiteljima, nastavnicima i profesorima, kao i roditeljima, želimo da imaju strpljenja i razumijevanja u podučavanju, te da svakom đaku budu inspiracija i motiv za učenje.

Ne zaboravite da su, pored onih iz školskih knjiga, itekako važne i lekcije o prijateljstvu, humanosti i ljudskosti.

Predsjednik Skupštine
Siniša Milić

Potpredsjednik Skupštine
Ivo Filipović

SKUPŠTINA BRČKO DISTRIKTA BiH



Adresa: Mladena Maglova broj 2, Brčko



Telefoni: 049/215-516 (centrala)



E-mail: info@skupstinabd.ba



www.skupstinabd.ba



facebook.com/skupstinabrckodistriktabih



youtube.com/@skupstinabrckodistrikta/videos